

四庫全書

集部

欽定四庫全書

集部

桐江續集卷二十一

詳校官中書臣孫溶

主事臣呂雲棟覆勘

總校官庶吉士臣倉聖脉

校對官典簿臣劉景岳

謄錄監生臣費元震

欽定四庫全書

桐江續集卷三十一

元方回撰

老而健貧而詩自志其喜八首

弱冠至休致日須成一詩貧猶常飲客老幸不招醫節  
欲無真病輕財似太癡此吟得佳句新買早梅枝

一時詩有思何待苦吟成老易惟難健貧多但少清藏  
書終不賣耽酒別無營十六年林下休官萬事輕

拙宦知今是顏顏及古稀寡言為暖藥微醉當寒衣空

腹蟬當飽長身鶴肯肥天容清更健不省桔槔機

萬山讀書地近偶脫煙氛

近吾州失火盡焚吾家獨免

幸保分膳廟

常營葬骨墳婿佳殊逸少兒懶過宗文忽憶門前月僧

敲醉亦聞

老翁處處有不健復何為貧戶家家是能詩始足竒東坡捐玉帶白傅放楊枝新有僧相識時來說易詩

清而貧最樂健以老何傷短髮蓬加雪貞心菊耐霜凍吟乏薪炭醉卧混衾裳冰檠憐兒女年皆四十強

才具雖無用襟期亦未非良難營脫粟誰肯質深衣為  
士當知耻觀人不相肥還家缺車馬猶解步如飛  
蹉跎早七旬老健保清貧識破元來易言傳恐未真但  
能積陰德焉用出陽神釋怨恩須報天終相吉人

初七日丁丑長至前喜晴

樓南紅氣滿霜天新霽湖山曉色妍七日喜逢長至日  
百年慙到古稀年故園捲餅思新菜凍井澆梅出暖泉  
誰信少陵夔府後肯吟六琯五紋篇

長至日書

年年春至此胚暉地上嚴凝地底溫能幾蟾蜍圓月魄  
即須霹靂起雷門知時久偃蛟龍勢養氣深培草木根  
表裏陽和見天道梅花別是一乾坤

用夾谷子括吳山晚眺韻十首

湖共江寬更海寬遙天縱翫復橫觀雅知山對吟肩瘦  
未怯霜欺醉面寒感召豐登饒粒食撫摩瘦敝起彫殘  
生靈百萬俱高枕公亦官清夢寐安

三吳百越楚天寬不厭登臨不厭觀畫舫紅橋隨處有  
丹樓碧宇倚空寒梅邊吟思春光早鴈外歸心夕照殘  
燈火沙河塘上路豈無凍屋卧袁安

梯天直上俯平寬故國繁華尚可觀西子有船春色去

伍員無廟暮濤寒

伍子胥廟在吳山僧取為寺尋藝之

九原事往人難問

四序功成歲又殘米賤酒平慰遲暮巢林聊得一枝安

抖擻羈懷強自寬時登吳阜一間觀陸機不作萑葦在  
雷煥無蹤劍氣寒倏忽池臺荒草合等閒歌舞落花殘

興亡生死真常在命要深知分要安

泰伯封疆四望寬勝將吳越舊書觀苧羅山下春纔到  
麋鹿臺邊沼已寒不有採香專怙寵可能嘗膽便除殘  
今年木德臨心宿重見家家衽席安

一錐無地百弓寬萬事須分兩眼觀仙子樓居凌倒景  
野人卉服耐竒寒金釵玉笋春帷滿黃卷青燈曉漏殘  
興廢榮枯手翻覆幾家能遣子孫安

蕩蕩天寬眼亦寬區區笑爾井中觀帆來狗國毛人遠



樓倚牛即織女寒迅速年華榆燧改槁枯世味蔗滓殘  
絕憐棺糞紛紛夢未必槐安果是安

情知新國用刑寬坐致湖山復舊觀浙右誰非三世宦  
江南終不十分寒錢王陌上花猶好蘇小門前柳未殘  
革故鼎新誰料得舉安天下勝偏安

極目無窮六合寬仰天如以渾儀觀日躔箕斗逢長至  
月宿奎婁屆大寒肘後方多難却老杯中物到莫留殘  
來年七十身猶健容膝歸歟亦易安

眼底曾中稍放寬超然何肯惑祭觀餘年早已知天命  
古道誰堪共歲寒驛使寄梅心獨遠禪師分芋口無殘  
十詩說盡登臨意我但徐行步步安

寄壽牟提刑獻之獻

并序

前浙東憲使大卿陵陽牟公獻之先生寶慶三  
年丁亥正月十一日生其賢子孫以丙申正旦  
奉觴為親庭慶七十紫陽方回亦以丁亥年前  
五月十一日生為雌甲子偶寓武林不能趨雲

上附賀客之尾唐白樂天劉夢得同生大歷七  
年壬子至武宗會昌元年辛酉皆年七十是歲  
樂天有詩云大歷年中騎竹馬何人得見會昌  
春今輒用此事為詩奉寄寓喜抃欽羨之意焉  
七十閒人兩地仙恰如同見會昌年詩名我愧劉賓客  
心事君真白樂天致仕元無官爵累藏書各有子孫傳  
磻溪淇澳可齊壽入相封侯恐未然

乃翁曾記脫靴亭直節高風有寧馨知命時年弃軒冕

傳心學問本家庭飽餐雲水仍茗水高揭文星更壽星  
我亦七旬乃雌甲林慙礪愧負山靈

曉思

霜天鐘鼓趣晨興老我無羶脚侶冰千騎馬塵跑玉勒  
一枝梅影伴香燈年當致仕元無位心亦懷歸苦未能  
政用括囊保衰暮可勞妬婦憤填膺

開鏡見瓶梅

開奩見明鏡聊以肅吾櫛旁有一瓶梅橫斜數枝入真

花在瓶中鏡中果何物翫此不能已悠然若有得

贈吳琴士會龍

古琴口歌兮手弦今琴何為兮不然今人作詩動千篇  
不弦不歌兮無傳關雎麟趾留遺編離騷以來諸吟仙  
我每見之月在淵請君携琴詣我古梅前君弦其後兮  
我歌以先君如夜寒不來旃昌黎之十操兮將獨歌之  
淚潺湲

乙未十二月二十四日立丙申春予忝七十

十歲端平舊丙申元貞重見丙申春幾災幾難到今日  
諸父諸兄皆古人未及懸車官已解不能負販子俱貧  
細思多少同庚者地下先埋富貴身

同丁亥生貴人不一  
亦多早夭死於非命

次韻鄧善之書懷七首

文原

二十八迴見天門闔左扉不嫌筆端退但駭鏡中非自  
愛希聲瑟誰知尚絅衣人生年七十肯復壯心飛

老懷饒感慨無一可歡娛久矣還初服胡然落半途流  
年蘇武鴈往事左慈鱸莫笑腰圍減還堪作酒壺

今代鄧元侯書牕不外求寡言良有味節用絕無愁真  
是溫如玉蕪能爽似秋鑿坡宜趣召夜直結隣樓

我聽髯張作清於月夜笳曹思先七子杜老到三巴有  
力能推拉無疵可汰沙文潛遺論在霜露老蕪葭

張仲實

子將今月旦可否判生枯高論真能借羈懷未覺孤竹  
吟風拂席花飲月當壚甚願陪遊屐唯慚老杜殊

許

以遜而綿者居然古性情溫恭瞻道貌響浪聽心聲施  
藥痊諸病留田與後耕日子拜嘉惠欲報乏連城

徐甫和

昭諫先生宅咸平處士廬大名無死朽外物幾乘除歲  
月勤稽古山林永遂初能詩直餘事焉不藺相如

乙未歲除二首

豈料身為七十翁開懷且放醉顏紅身存惟恨恩難報  
世換還驚事總空百歲尚餘三袞數萬詩枉費一生工  
盍簪列炬渾如夢不似今年築底窮

五十五時官早休即今七十復何求亦思稍為兒孫計  
政恐深貽祖父羞豈不憶家良有說偶然得酒更無憂



諸公富貴新桃版我是春前舊土牛

丙申元日五絕

新年仍着舊年衣老健深慙七十希  
一炷爐香拜天地  
今春早早買舡歸

五更春雨細無聲石路濺泥齒  
屐鳴後飲屠蘇懶奔走  
可能也喜鵲鳩晴

雪餘連雨滿城泥  
唱道宵行萬馬蹄  
昨夜隔年書未點  
瓶梅燈畔一枝低

送寒迎暖柳梢知風自東來着意吹百萬人家賀新歲  
幾家茶壘有新詩

案上瓶梅閱兩年添花未有買花錢東風恰似憐窮客  
吹到新詩四五篇

謝張老山御史鵬飛慶予七十

身是空中一點塵心包天地却無垠隨緣任運動收斂  
補過知幾暗省循孰料百年登七袞深慚白髮對青春  
江梅欲結枝頭子合放餘花次第新

又次韻張御史鵬飛

休致衰年暗自驚，聞呼張丈喚殷兄。  
馬塵往往逢新貴，鷗夢依依憶舊盟。  
洛社繪圖慙九老，漢庭綿蕞付諸生。  
繡衣御史煩推轂，我有蓑衣永不更。

來詩蒼天定俾期  
願壽會看芸書聘

更五

次韻俞好問慶予七十

固窮早類從心孔，嬾讀今如便腹邊。  
時制堪驚小戴記，初筵敢擬衛公篇。

小戴禮六十歲制七十時制衛武公  
九十五入相于周作抑之詩以自警

今毛詩賓之初筵是也此詩五章其前陳古飲酒有禮其後刺時飲酒無度有威儀抑抑之句故國語名此詩曰抑韓詩異義則曰賓之初筵衛武公飲酒悔過也九十五方悔飲酒之過無乃晚乎當從毛詩序文為是

云何此老偏令壽其或斯文遂有傳見一庵前碧溪在

花瓢歸飲許仙泉

予買得宋尚書貺宅基以居有見一庵址花瓢許宣平也

正月連雨

新年未有一詩新轉覺羈懷感慨頻人日直連元日雨  
梅花合讓杏花春避愁愁不捨孤影怕冷冷偏纏老身  
幾夜五更了無寐床頭點鼠亦欺人

題羅雲叔周昉宮女

顛倒三郎養祿兒當年想是此蛾眉  
不須真有聊須畫  
或可東城出一奇

追用徐廉使參政子方申屠侍御致遠張御史鵬  
飛元日倡酬韻六首

萬馬鳴鞭欲曉時閒人盥漱未妨遲  
兒童賀喜休多拜  
卿相遷除不預知隨分乍醒仍乍醉  
放懷無喜亦無悲  
新年自愛新詩好歛硯梅邊洗刷絲

名臣汲黯鄭當時筆陣秦王將尉遲疾電震雷千里起  
乖龍老蜃九淵知諸公猶羨歸田樂老我終無叩角悲  
補衮得人卧桑野可愁二月賣新絲

物有先時有後時天工無早亦無遲飽禁夜雨元非惡  
暗受春風或未知一死頻煩衰白報三生不為落紅悲

解紛憶得吾家學徑與揮刀截亂絲

方賢良  
儲故事

即是黃鶯紫燕時稍晴肯放百花遲酒來尚許顏紅借  
春好何容鬢雪知扶杖可從靈壽賜聞琴肯作孟嘗悲

山深粗有延年藥歸老松根掘免絲

歲歲花時是病時不爭春早與春遲陰晴謾復題  
節氣還因檢歷知杜若薦芳聊可采秭歸啼苦未須悲  
老翁堪與少年競勤把青銅照領絲

七十翁非浪走時夜牕自恨賦歸遲睡稀枕上無春夢  
吟苦樓前有月知茅索願追田畷喜瓜新遙念室人悲  
却須天上綸言手小為農疇緩爾絲

茅索

晝爾于茅  
宵爾索綯

田畷

田大夫今  
畷夫也

瓜新

詩有敦瓜苦烝  
在栗新敦圓貌

苦瓜人所不食，烝久也。粟薪，周豳土之薪也。言有圓形之苦瓜，久在粟薪之上，無人採食，喻征夫久在東山，不歸也。

題祝公輔靜得齋

鄭衛撼俗耳，姬姜接凡目。醇酎誑渴吻，大房誘饑腹。一  
闕內外間，鮮不妄舉足。堂堂七尺軀，頃刻萬感觸。人生  
性本靜，情動乃有欲。靜善動亦善，堯舜可同躅。動惡喪  
厥靜，為桀為禽犢。恭惟方寸心，性情賴管束。勿狎寧孔  
畏，匪狂尚箕肅。思精造詣深，察久酬應熟。北辰居其所。



初九不遠復可待豮豕牙故已童牛牯

豮豕之牙王弼與諸家說皆非

惟陸佃埤雅謂大豕必建牙以繫維之與童牛牯文勢方偶

性靜人所同心靜我所

獨心靜非不動存性情乃伏天地與我者所寶不盈掬  
完我所固有得之異逐鹿苦辛子祝子為親營半菽頗  
欲謝湖海歸歟卧茅屋清夜一孤燈不疲內自燭養氣  
非養體未藉臺餽肉胷中線五色筆底泉萬斛誰其相  
料理回首送鴻鵠離婁下十四三自義何縉紫陽居資  
對我亦當熟讀

贈癡庵柴頭陀 并序

頭陀年六十五歲柴其姓子三人長廷玉為華  
亭尹身棄官為道結庵毗陵日不再食十餘年  
嘗贈予條帚三歌以贈之

蕭梁宗補闕棄官為頭陀一篇息心銘至今猶永歌不  
愛紫綬黃金帶不愛雕鞍白玉珂草屨布衲一筇一蓑  
臺城一旦甌墮地公卿麩爛債干戈當時獨有宗無名  
邈然野鶴山之阿今代柴癡庵獨把竹帚柄待掃衆生

塵同作大圓鏡不肉不饑不綿不冷太室為衾大塊為  
枕一飯不再餐一茶不再飲脫袍擲笏作百姓十年悟  
道保真性昭文大學湛然翁半夜室中傳祖印無求於  
世長精神自淨其心延壽命野狐禪子落邪蹊唯我癡  
庵獨也正向來解后逢癡庵贈我竹為帚者三一掃嗔  
二掃貪惟有一病掃不得兩癡相值同酸鹹雖然我更  
有一帚建立天地同不朽掃愁掃鬧掃是非其帚何名  
名曰酒

送曹士弘

毅

四明文亭巡檢并呈前尚書翰林學

士王公伯厚

應麟

之子博古今妙年着儒冠顧肯易戎服屑為游徼官未  
喜弓力武尚愛齏鹽酸紫面頰骨聳赤心膽氣完得非  
真將種終當拜漢壇曰子俎豆學素不夢糞棺甬東富  
海物豪鮮供烹餐曰子豈嗜味啖茹實所安共惟伯厚  
父三八專金鑿萬古貯曾次四溟酒毫端今年七十五  
兩紀歌考槃舉世一影獨晚進再拜難庶幾因此行樞

衣趨門闌幸不辭孺悲晝夜勤仰鑽列宿共辰極衆羽  
朝祥鸞萬物各從類同心臭如蘭去去不可追著鞭駛  
征鞍我亦意欲往惜哉步蹢躅

贈數學蕭吉卿

石抹伯達

著草占周易君從簡處尋運籌見竒偶落筆判升沉總  
悟生時數誰萌分外心吾衰今七十惟有死山林

與孟能靜飲聯句復和三首

三月一日春如酒紅是桃花綠楊柳人生不醉欲如何

不如意常十八九孟暫茲袖公補天手誰能箝我談天  
口挹斗酌海兩相逢天風吹入無何有方

三月三日一觴酒同上危樓望晴柳豈可不飲負此春  
向來風雨十朝九方何必水邊看麗人何必水晶行素  
鱗曲阜橋邊同一醉杭州城裏兩閒人

仕宦可止不止酒乃所願學陶五柳春夏秋冬皆有花  
四時無日不重九莫欺左持蟹螯手莫笑涎流麩車口  
醉能題壁又能歌德行文章總無有

三月六日再用韻二首

忘形爾汝日詩酒閉戶拒客笑泄柳慷慨酌屬我輩  
若楚雲夢吞八九隔橋暫許作隣人莫待寄書憑鴈鱗  
聚首良難分手易人生誰得自由身

百杯不亂善食酒如手捧玉肘生柳貌醉心醒戒亢悔  
一斟一酌乾用九猶龍世豈無斯人漁網可致皆常鱗  
螺贏螟蛉勿浪語得似劉伶雞肋身

三月初五日孟君復王元俞治中十人同會分韻

得詩字

春光九十日半為風雨欺人生一百年懷抱無好時茲  
辰復何辰晴煙霏柳絲佳友可我意閒愁忽如遺座客  
有十人十人皆能詩景色既已妍談笑無相疑酌酒不  
計數惟醉以為期鬪韻有險易鶴頭側復垂上巳後二  
日此會竟大奇芥蒂死生間吾嘗笑羲之王侯宰槐國  
蟻身不自知顧此一夢耳不飲庸非癡

呈吳門王治中元俞都中參政伯大孫先人同榜



君家兩參預漢代韋平氏留耕而耕存惟有是以似乃  
祖忠文公補天扶國是乃父敬愍侯浮海將使指直諫  
炳遺藁大節燧信史神遊天地間不亡何謂死先人前  
甲戌忠文榜下士一升上雲端一沉墮井底老夫近乙  
亥敬愍守吾里朱轡過桐江共飲釣臺水英英玉樹郎  
世濟元凱美忠文既有孫敬愍又有子邂逅忽相逢不  
意聞正始貯曾踰萬卷運肘動百紙華年弱冠近緊官  
半刺比長風破巨浪未易測涯涘契好詎敢論臭味差

足恃異時吳闔遊小舟或一艤相門復生相貽厥有如  
此乃知吾家兒不過豚犬耳

孟君復贈王侯元俞詩兩皆英妙神奇次韻

孟侯與王侯妙年俱作州窮窮鬼揄我汝堪並英游汝無  
曲逆計汝無裨謀汝乃蹄涔水可配江河流倉卒不  
能答吐舌瞠雙眸二侯不自貴屑與耄叟儔歌豈有檀  
板舞亦無珠韞磨玉藉沙石以故交情綢蓋公曹參舍  
角里張良求綠鬢間白髮一獻還一酬俗態動枿鑿對

面風馬牛二侯不我棄庶哉企前脩

呈呂使君留卿

師張文福子  
衢州路同知

大門昔有謠呂氏一千中華胄所自出恭惟齊太公君  
伯先郡王張韓劉岳同百戰護諸將易名稱武忠武忠  
棣華衆皆有遠祖風分閩仗斧鉞威望真非熊子姓幾  
百人人俱英雄人人俱智慧人人俱疏通三衢今使  
君尤其明且聰劒光夜衝斗玉氣日貫虹好士出天性  
坐滿樽不空民懷吏膽落於物大有功驛馬走中原蹇

蹇臣匪躬北上夏雲赤南還春花紅割牲飭鮓脯邂逅  
孤山東念此門下士陋巷甘固窮昨者諸彥集長裾織  
青葱豈謂龍虎閣著此垂翅鴻高懷極戀戀莫景殊匆  
匆願言一轉手西江掛飛蓬

記三月十日西湖之遊呂留卿主人孟君復方萬  
里為客

丙申上巳七日後一主二賓夫豈偶遣車却騎錢塘門  
主人滿船富殺酒別喚輕船載僕從大船品字着三友

旁觀指點知為誰對峙玉人間白叟豈無識者訝此老  
不愧妙年兩賢守孟侯呂侯將相家早綰金章紆紫綬  
方干雲孫聳吟肩左右鼎鼎中瓦缶雖然蘭臭尚同心  
劇談鋒起各虛受是日杭人詫佛事焚寄冥財聽僧誘  
公子王孫傾城出姆携艷女夫挈婦放生亭遠驚長堤  
保叔塔高陟危阜居然紅裙濕芳草亦有瑜珥落宿莽  
暖熱已極天色變大風滔天怒濤吼篙師繚繞孤山背  
倘佯裏湖保無咎百舫千舫第二橋四聖觀前依古柳

春色濃時良佳哉遊人聚處可捨否一杯一杯入醉鄉  
詼嘲譎笑無不有泉幣重費忘多少歌妓頻呼雜妍醜  
似狂非狂癡非癡何啻萬衆悉迴首我時頽然乎其間  
看朱成碧辰至酉健啖晚菘兼早韭快賞調冰仍雪藕  
歸途恍然了不記曉牕半醒卧噎嘔一日之樂三日病  
寧負衰軀護饒口願從孟侯觴呂侯更着百千沽十斗  
今春苦雨初有春半曾無十日晴之句去立夏無  
幾日愈雨足成五詩

小樓欲下怕泥行  
春半曾無十日晴  
老眼看花如隔霧  
只消卧聽賣花聲

今年草草過清明  
春莫曾無十日晴  
擔上牡丹猶許見  
城中渾不識鶯聲

青梅未了已朱櫻  
春盡曾無十日晴  
稍欲出城問蠶麥  
生愁城外杜鵑聲

湖頭准擬賞新晴  
雨過風號萬馬聲  
宋玉未誇巫峽夢

杜陵翻作漢陂行

記三月十日事

讀書聽雨過三更定是明朝又不晴  
就枕未甦饑鼠出  
掀書舐硯上燈檠

春雨不已甚憂蠶麥二首

提籃采葉雨淋漓  
蠶婦無言恨自深  
綺陌惜花小兒女  
愁眉相似不同心

籠炊湯沸餅如銀  
辛苦焉知種麥人  
今歲夏初似高鳳  
黃雲欲割半沉淪

題柯德陽埽塵齋



堯舜上聖姿猶以學為事矧伊匪生知不學知不致可  
學而不學是謂自暴棄俯首就佔畢又患學不至恭惟  
天地心無極一生二陰陽既已判太少二生四生生滋  
無窮科斗積乳孳籀篆隸真行同文或以異因繼幾前  
王冊府建中祕號為蓬萊山校書及正字計資不量材  
抱槩別蠹類尸優副劣間顛倒足笑喟之子讀五車便  
腹為篋笥合登天祿閣太一照藜吹顧使踰蓬蒿飯茹  
宮有血陳蕃掃天下借曰未得位埽我方冊塵我有筆

為簞籩勤極精審披閱盡劬瘁殘火秦坑遺斷簡汲冢  
出端倪究盤頡古初探炎隳五十衍著爻九百采稗記  
微吟泣山精幽嘯却野魁淨几如我心暗室了無愧老  
夫敢苦口曰此藝成易點畫攷譌訛是亦學之次邇年  
斯道衰無柰異端熾函谷青牛關洛京白馬寺敷落帝  
八言為國膏肓崇楊墨合為一不仁復不義外若示兼  
愛實則內自為愚民謹趨之此患恐未已儒冠不能關  
拔白立赤幟何至畔吾徒捨此彼之嗜太玄豈不奇甘

從高閣墜鍾山說偏傍奎運竟跋屨洙泗以至今關洛  
最為粹知艱行尤艱方寸宜默識勿謂周鼎淪後無漢  
唐治大學久無儒此亦見大意大匠操規矩不執斧鑿  
器當如九方臯無以色見驥

索雲叔新茶

穀雨已過又梅雨故山猶未致新茶清風兩腋玉川句  
三百團應似太誇

閒書二首

年來心事樂陶陶，氣不低垂亦不豪。  
酒飲八分何必滿，棊贏一子便為高。  
脩行到此元非易，把捉從今更要牢。  
搢笏可須煩左手，年年留取刺持螯。

草木歸根白露零，寒螿欲蟄動酸吟。  
每驚世事如翻手，難保人生不負心。  
曠野嗟嗟三獻玉，權門詡詡四知金。  
舊來梁上稱君子，猶自潛形伺夜深。

呈孟君復能靜使君二首

淳

君復年三十三杞之高也，予七十瓜之下也。屈

英妙交衰老以杞包瓜也

細翫包瓜以杞艾俊人肯與禿翁交公侯復始須廊廟  
爾汝忘形未草茅各誦新詩針遇芥相期古道漆投膠  
一樽百尺樓頭酒玄白無心賦解嘲

乃祖麒麟第一人乃孫今代筆如神三遷孟子慈闈教  
十二甘羅相閱身海內豪吟公與我花邊痛飲夏連春  
浮生倏忽關山隔數步過橋莫厭頻

用前韻酬孟君復二首

吞若虞翻夢裏艾古人不死與神交成名永保傳青簡  
臨事終當藉白茅足可一瓢居陋巷豈堪二膳養東膠  
龜藏六用泥中樂未信時人蠓蜒嘲

眼空敢謂世無人松菟相依似有神邂逅十洲三島客  
崎嶇萬死一生身深斟滿酌堪同醉雪鬢霜髯媿不春  
別後詩筒恐難數何如聊爾倡酬頻

送天台楊仲儒秀才如北

靖

送君詩者悉豪雄男子身窮道不窮為問何憑遊海內

唯應所恃在胷中渡過淮水即河水路背南風多北風  
誰料褐衣抱珠璧九霄夜月貫長虹

贈綦大將軍

晉叔達

將軍早學萬人敵從父行軍十六七上馬如飛海東青  
大羽勁弓轟霹靂直欲生擒彼不庭天山之北北復北  
總兵王子設危竅陷陣先鋒淪異域時或偶違心轉壯  
身可斲糜膝不屈夜驅汗血還漢朝萬里沙場如咫尺  
臣父以死報國家潔雪父冤見天日

先皇玉帶親解賜加侑金錢千百億登時築壇拜大將  
隨意委禽聘賢室前茅出鎮萬貔貅東南五湖天半壁  
鳳凰山下忽相逢我舊聞名今面識精忠純孝故無雙  
武藝文材俱第一既能高著國手棋又能穩賦作家詩  
既能善戰善騎射七書背誦無餘遺又能雙鉤寫楷字  
顏筋柳骨妙畫錐既如諸葛渡瀘水又如龔遂清潢池  
章亥六合半已到象胥九譯靡不知涼州蒲萄無復染  
交趾薏苡夫何疑踴場壯士閱劒舞鈴閣騷人陪酒卮



笑談灑落意嫻雅喜看賓主無厭時邇來宣城察事尤  
瑰竒明目張膽鋤羣私去年稻田百圩沒秋潦至今猶  
渺瀰孰謂不潦罔省府公斥其人真姦欺百戰將軍古  
有之未聞將軍亦肯念民饑

送楊剛中巽申嘉定州教

忽似登黃甲元來本白丁官清專學校思重感朝廷側  
聽吳儂語謹傳蜀產靈儒風嗣言偃子細為談經

次韻趙雲中飲呈孟君復二首

若飛

舊業田荒百頃萊  
眉頭長與醉懷開  
春愁忍共金釵訣  
夜禁偏嫌玉漏催  
聚散有情都是夢  
古今無物不成灰  
何時再覓狹邪路  
白骨誰非塌井苔

可遨崑閨步瀛萊  
祇愛鑽腮笑靨開  
暮雨朝雲元易散  
昏鍾曉鼓故相催  
身如病鶴猶遺骨  
心似焦桐亦未灰  
縱使吾曹不排闥  
不應門闥上蒼苔

讀孟君復贈岳仲遠  
後詩勉賦呈二公子

維岳武穆王復讎議不合  
老檜賣中原神龍困蟻噉  
維

孟忠襄公緩兵策弗納清之三京師萬衆死者亦儉黨  
梗國論孰與噬而噍世事可流涕循至虞不臘秦鄭兩  
姦駟百年棺已闔骨朽遺臭在厥後極茸闡岳氏家幾  
傳陽羨溪山巾故書三萬卷金石爛模榻孟氏神童孫  
卜宅占茗雪詩聲鸞鳳鳴衆作掃蛙蛤猗歟先王公百  
戰動摧拉身在國庶幾心與天響答造物報勲裔縱未  
黃其閤各各神仙姿不受塵土雜臭味崇芝蘭情誼篤  
鷓鴣着我珠玉間鬢蓬愧衰颯冷話暗燈火清宴倒壺

榼時凭城邊樓同望湖外塔二豪馬蹄花春堤厭蹴踏  
而我枯如僧山肩一破衲未甘脫儒冠蕭寺求掛搭終  
不望漢廷安車聘申蓋顧獨喜結交勿疑朋簪盍同道  
脂漆膠開誠去梘蠟將相祭戟門六轡駕羣軸七十返  
初服無復鞞韎韜豈其珠履中不許青鞋鞞

送温州學正陳希靜

雲宗

多士推溫學者儒佐冷官雖為絳帳亞似可錦衣看父  
老時粉社師生日杏壇在家書宦考三歲定朝端

送太平州張府判鈔庫官還任

判州垂闊步筦庫忽斜飛談笑胷無物精神眼有威將  
門生貴種詩域悟玄機捉月江頭路吟鞍幾醉歸

送汪庭芝高士如嚴州

四海無家只一身桐江西上訪僊真七年太守吾聊爾  
况汝窮山管道人

書符呪水空多事辟穀熬鉛苦用心閒讀異書痛飲酒  
佳時亦復一彈琴

我致仕年死期近汝出家時生理難滄海桑田何可料  
一極別酒莫留殘

送宜興張教授彘彦高

憶我南湖老循王又有孫新升陽羨郡改觀大成門官  
異吏曹冗士知師道尊諸生果成服此事要深論

前參政浙西廉訪徐子方得代送別三十韻瑛容齋

往時參大政諸老扈先朝合執調元柄猶乘問俗輶登  
良爰改紀肅政各遷喬明甚奎文揭堅能泰岳搖吳山

懸夜月浙水噴秋潮薦拔皆竒士寅恭盡選僚重名三  
翻鼎古韻九成韶混合氛祲定因循習尚驕不扶儒學  
起焉革庶風澆周繼言堪攷殷因世未遙西湖舊精舍  
南渡昔園橋祠植三賢仆書重萬卷雕武林增炳煥文  
廟鬱岌堯不朽垂聲價無窮泐詠謠學肩游子夏謨過  
益臯陶鵬運三千日龍飛九五朝遐方馳幣聘曲藝齒  
旌招共擬膺三錫何煩奉六條有心思綠野無意上青  
霄壯節甘恬退高風久寂寥一閒如我願百病應時消

僉謂衣當袞公宜館有翹終須坐廊廟未許老漁樵世  
道存元氣天時正斗杓圍腰堪玉帶畫像早金貂慶會  
逢樛木恩榮侈蓼蕭自憐耽杜酒誰肯顧顏瓢每辱高  
軒過無嫌闕市囂七旬慙暮景三載傍清標再見知何  
日臨風淚欲飄

丙申生日七十自賦二首

先君無罪謫封川天畀遺孤出瘴煙忽到古希年七十  
猶思上大化三千苦吟足可編詩史狂醉真宜號謫仙



五子傳家無一物聊將書冊當青氈

一尺光陰七寸餘暗驚前路恐無餘  
匹如月欠三分滿又似雲飄六片初  
學問文章俱廢忘科名官職總空虛  
諸孫中有小丁亥十歲應能讀我書

牟獻之提刑來杭納壻慶予七十次韻二首

獻

論交未覺白頭新閉戶車成合轍輪  
自古云希七十老即今僅見兩三人  
欲心久絕身宜健醉鼻常鼾夢不春  
嫁女婚男多少事忘懷任運莫傷神

扁舟一水接湖杭久別先生道德光  
名子我方思右咳  
隔隣公此選東床彭聃上壽終漸盡  
劉白同年各健強  
梅子黃時雨如許小留信宿共清觴

孟君復仲春來杭相聚三月餘一日必三胥會忽  
焉告去直叙離懷為四言一首

九年三見昔踈未親一日三見今也何頻有來者馬于  
雪之濱有柳未絮時維仲春豈無可交華屋朱輪接膝  
握手豈無他人睠焉陋巷總是累臣孟獻忘勢王翰願

隣嗟子之意孔厚且真揣我所有間無一珍英英令節  
穆穆良辰汎彼清漣出其闔闔和風吹衣芳露滴巾載  
聽其嚶載采其辛乃饌我鮮乃酌我醇我酣子謔子吟  
我呻我無子閱子無我顰厥月三團百笑弗嗔積潦滿  
道朝炊無薪繫鞍于門致此嘉賓我窺子曾萬卷橫陳  
目電舌雷筆聖詩神鍛以一字衡之千鈞吉甫史克蒙  
莊靈均出其下者詛楚過秦等而上之清廟生民子踰  
立年我登七旬顧影自憐髮禿膚皴衰顏槁悴老語謔

諄送子此謠肝膽輪囷子之家世凌煙麒麟子之爵位  
曲逆平津我幸未死山林食貧兩不相忘雲鴻水鱗

次韻張師道慶予七十

伯淳翰林直學士子告

齋沐披來卷焚香道主臣誤蒙玉堂老垂顧草廬人帝  
所聞韶奏朝廷掌制綸屬請平聲長孺告肯逐子雲貧公  
佇登翹館吾惟釣富春骨將埋塚墓心敢望陶釣百歲  
倒七指萬形歸一塵莊生真浪語豈有八千椿

送常德教趙君

與仁舊臨安判官

岳陽州城危樓前無地但有水與天一點之青惟君山  
四顧洶湧心茫然吾嘗北風吹湖舩飛過洞庭一日間  
高桅一昂摩日邊及其一低如沉淵竈不可炊薪不燃  
躍出釜水如盆翻神驚魄禡乾坤顛江豚出沒蛟鼉掀  
小兒號啼大人眠猫嘔狗吐流腥涎饑僵渴仆三不餐  
自曉至昏縮若拳始從武口入武川然後相賀性命完  
龍陽縣西百丈牽古鼎大鎮控羣蠻丹砂水銀充市廛  
千機織錦綠紅鮮北上江陵通襄樊南接長沙衡岳連

陶淵明記桃花源訪尋遺跡揚吾鞭長松巨栢萬且千  
近人不畏猿猱懸琴床藥爐灑瀑泉白髮道士如神僊  
尺許大字鐵屈盤吾詩頗竒留刊鐫此事一往四十年  
至今夜猶夢湘沅隆準雲孫腹便便昔者金門班鷺鴛  
胡為近亦寒無氈屑往芹宮專冷官畧有廩粟有俸錢  
飯雖不足聊粥饘風雅之後聞屈原千古哀怨離騷傳  
惟楚有材實多賢幸為人師何憾旃坎流叵測行止難  
或逆而泝順而泐可不隨機信天緣竹枝歌聲宮商宣

木奴洲畔饒風煙三年當有詩千篇

桐江續集卷二十一



欽定四庫全書

桐江續集卷二十二

元方回撰

送楊復之歸吾里

復州學錄

四十青春七十翁  
客樓時得一樽同  
子將仕矣雲霄上  
我合歸歟澗谷中  
涼夜歲星守南斗  
豐年江國喜西風  
許追父老鷄豚社  
為說猶能醉頰紅

題獨鹿圖

誰嘗失之羣起競  
遂不見泰山一得  
百覆文王之囿草

羨泉足生逢茲辰叻叻攸伏

題九歌圖

惟此楚騷能歌蓋寡我醉友能老嚴灘者駕風驟雲此  
誰其寫是常夢中與之遊也

七十翁五言十首

豈謂真成老元來總墮虛它鄉身似鴈永夜眼如魚未  
覺知幾早惟嫌料事踈縱無三閣饌猶有五車書

愁與憂全異歡於樂尚遙百年元易度一日却難消玉

巨圭中必桐猶爨下焦襟懷殊鬱鬱縱目却飄飄

五月炎歎早冰盤未薦瓜客中如許熱林下豈無家體  
炎巾繒火膚斑點鐵砂一椀慶七十汗滴暮樓霞

瘴癘金蠶毒干戈鐵馬羣一生逃萬死百歲僅三分惶  
恤恒饑子姑留自祭文醺醺人笑我方寸不醺醺

七堠長亭路前程已不多最欺吾老者絕柰後生何去  
晚陶弘景迷凶馬伏波幸逢黃菌耦且賦紫芝歌

隻影兼孤喙攢眉更結喉一生無大喜萬種有閒愁冠

豈羞言路憑熊齒郡侯休官十六載不報破家讎  
故人書見問近况復如何酒病沉綿劇詩愁感慨多脛  
枯全似鶴髻小僅如螺更許十年活漁磯破幾蓑

父母嗟難報乾坤荷曲成居然生壽相頗亦竊詩名箕  
子九疇範太公三畧兵老身寧坎止時彥或流行

詩家自有律高處在平中能使生為熟何愁拙不工嚴  
祠七里瀨漢鼎一絲風敢謂方虛叟還如陸放翁

陸務觀六

十二歲知嚴州後八十五卒平生詩  
萬首予四十九領此郡七年今七十

紫陽山下住問字足儒生鮮果枝頭熟新醅甕面清學  
師朱仲晦詩友許宣平焉得孟能靜滄浪共濯纓

寄題呂常山平章錦繡香中

富貴歸故鄉猶衣錦繡畫行此古語也漢書項  
羽傳曰衣錦朱買臣傳曰衣繡二人所為不足  
多道五季錢王歸臨安以錦繡裹林木眩其父  
老偏霸無足取惟韓魏公相州堂歐陽公為之  
記謂非誇一時榮一鄉者今平章政事常山呂

公以將相歸老金陵有之似之扁舊百花亭曰  
錦繡香中夫百花似錦繡無日不春所謂衣錦  
繡而畫行者也錦繡而又加之以香雖取義於  
花其實亦以譬夫香名之垂百世也斯樂也惟  
知止者能之故又有亭曰知止有賦長句十二  
韻者方回依次和曰

修善過如修亭館種德高於種花木四時芳菲人不知  
蜂猶有鼻蝶有目公心一寸春萬宇好事如麻不計斛

將相富貴世不少鐘鳴夜行鼎折足我公之遊追張良  
我公之隱勝梅福猶憶妙年伐鬼國二師擊宛騎斬郁  
獨樂先生五畝園大庇寒士萬間屋圖形已上功臣閣  
投老未數王官谷千葩萬卉春晝長范蠡西施着膏沐  
錦天繡地香中醉漢相政窘千金贖一品閒身釋衮衣  
萬古芳名垂汗竹紅霞蒸處幾東風會見瑤池三度熟

七十翁吟七言十首

莫笑衰頹七十翁老來柔外尚剛中評詩青眼時雖白

借酒蒼顏也自紅  
輕薄交遊翻手雨  
艱難仕宦打頭風  
休官至此六逢閏  
能忍窮人不送窮

自笑衰頽七十翁  
全將拙鈍易豪雄  
猶賢乎已思詩苦  
不失其馳飲酒恭  
女嫁男婚俱失望  
廷臚殿對總書空  
倚樓夜夜看星斗  
未了昏鐘又曉鐘

一鳴場屋老書生  
晚節蹉跎百不成  
舊試卷忘塗注乙  
新吟藁漫草真行  
柄臣全似逢崔胤  
座主徒勞識李程

第五阿房關許事  
樊川終自有詩名

子別省僥倖第一  
廷對考官常挺趙



曰起文天祥擢予第一宰臣賈  
似道降為二科之首升甲科

飽觀代謝四時成勿訝陰晴小變更何許三牲聊淡食  
向來五馬亦徒行長哦王粲登樓作浪得朱雲請劍名  
我死故應非短命彼饕誰果是長生

千古斯文未陸沉夏因周繼太駸駸瓜分繆主糴郎學  
灰燼陰傳檜賊心江總不慙同北狩鍾儀何限尚南音  
一龕花院傷前事猶勝棺穿蔓草深

幼孤何敢事兒嬉聞道惟慙性鈍遲早尚虛文迷釋老

晚叅實學沂瀛伊五更燈火芸千卷兩世冠裳桂一枝  
夢幻無成吾不怨庾愁江恨鬢絲絲

神奇臭腐變窮通宇宙紛紜醉眼中鄧禹第堪文學掾  
劉歆早作國師公干戈世故千岐異禮樂民彝萬古同  
造化豈應全贖贖秋來依舊有西風

幾夜樓東曉望時長庚缺月傍參旗江湖已滿焉能久  
天地將秋更不疑暑漸變涼差可喜老難重少自堪悲  
年來輩行凋零盡詩卷中多賦挽詩

三十科名續父燈豈知七十老無能  
兒童半長餘猶幼  
門戶中衰久未興  
南畝盡捐猶有宅  
白頭垂禿已如僧  
平生詩力秋尤健  
萬里霜天擊怒鷹

顏齡僥倖古來稀  
休致多年但欠歸  
決不再思龜左顧  
幸猶免賦雉朝飛  
江山如舊幾寒暑  
天地無情多是非  
能辦東籬一杯酒  
可須疏傅有金揮

送李際可婺源州學正

良遇

星源初建郡芹泮  
視諸侯前序聯官  
長公堂糾士流彥

章陸贄作元晦孟軻儔遺帙三年飽畚租少莫憂

送張古心明道山長

後

恭惟程伯子遠紹孔門真間氣千年聚遺書萬禩新金  
陵明道長草澤古人心坐席諸生侍春風迹未陳

送陳子振池州學正

鐸平  
江人

聞說池陽郡初能曲突虞學官如舊否文選尚存無魚  
蟹江淮聚桑麻雨露腴物平仍酒賤時佩翠微壺

六月二十八日立秋

平生為客太怱怱，已上西江又復東。  
只信一朝飛舴舨，何知五度落梧桐。  
絕憐牛女常遭謗，粗足蓴鱸不嘆窮。  
世外世間異天壤，政須深谷卧秋風。

七十翁吟五言古體十首

無妻牧犢子帶索，榮啓期予亦年七十。  
幸猶未至茲，頗亦似陶翁。粗有五男兒，乃父休官早。  
致汝恒苦饑，掛冠六七閨。方當掛冠時，治生了無策。  
惟耽酒與詩，室人愧交謫。雖壽夫奚為，後死信無益。  
固窮諒何悲。

昔聞老萊子希年奉慈親佯作小兒啼爛斑綵衣身事  
有異天壤予生何不辰三歲喪吾父萬里南海濱先君  
四難弟今皆為古人五房伯仲十獨予登七旬道路謾  
奔走燈火徒苦辛此詩比蓼莪一吟一傷神

先祖八十四卒予生之年

先祖紹興十四年甲子  
生寶慶三年丁亥卒

先父

五十六予甫三歲焉

先君淳熙四年甲午  
生紹定二年己丑卒

厥今七十叟

萬死偶獲全過父豈不愧逮祖恐未然初學晚頗進粗  
亦窺聖賢常感知已恩不報負我寃夢寐此心明暗室

如青天無田與兒孫未為無所傳

五男三女兒僥倖肖吾祖賢愚掛懷抱笑陶敢効杜長  
男近寄書長女化為土嗟予七十翁哭此四十女此女  
抱恨久嫁不得其所厥夫實鴟鴞厥舅乃狼虎讎訟欲  
殺予破家謝官府不禁毀壁痛何啻茹荼苦

詩人而壽者近有數老仙後有陸放翁前有曾茶山亦  
復有二趙南塘與章泉年皆八九十至今詩集傳南嶽  
五藁出豈無劉後村老妓風水僧兩詩太不然三生感

容堂晚節尤可憐虛叟年七十努力當勉旃

後村老妓詩却羨

姬門戶熱隔樓燈燭到天明得罪名教贈風水僧誦得山經如念咒頂將禪笠去尋龍陋句甚拙容堂賈似道

暮年自稱後村七十以上造朝八座有詩云三生不可忘容堂

後山與簡齋僅年四十九詩少句句佳天地同不朽予

幼初學詩一日賦一首頽齡忽七十詩果傳後否僥倖

擢儒科邂逅至郡守幾死坐此耳詩於我何負壽長詩

故多才短詩故醜苟活許作詩餘生付詩酒

晦庵感興詩本非得意作近人輒效尤以詩言理學志



南寫柳吹曼卿詠禽樂我翁盛稱之豈不物象托小菴  
旗誇酒大賈褐懷璧唱咄野狐禪未必實有得歐公不  
論文孟子不言易平生守所見弱冠至七十

幼嘗習古詩生平不滿百人生如蝸牛欲升一丈璧我  
幸七尺身燥土餘三尺目此寸進難涎盡喙不濕平生  
修省心不啻震虩虩晚若蹈虎尾更甚履愬愬庶幾其  
可免寧受凍饑厄徒步勝安車亦勿乘下澤愬愬色責切

今所以知古賴世有書史後所以信今豈不亦藉此昔

在韓魏公治平四載耳仁皇實錄就賊賈獨不爾竊位  
十六年不奏理廟紀咸淳至德祐抑又可知矣國亡邪  
正混袞撻筆孰泚袞翁抱丹心但恐將溘死

世短心徒長日暮道更遠偶榮匪運泰驟落非命蹇王  
侯死無葬將相謫不返賤窮齒秃缺尚許噉糲飯配享  
宣尼廟文學可商偃云何從祀庶傳註王鄭混平生三  
萬卷晚節葉糞本外華已焉哉襜襖謝公袞

七十翁吟七言十絕

自知酒量防踰矩敢詫詩才妙斲輪古聖賢心得絲許  
雖非尼扁異愚民

頓爾繆為象山學雕吾痛絕水心文潛夫詩格温夫字

掩耳平生不願聞

後村詩非不  
工但格卑

詩備衆體更須熟文成一家仍不陳晚悔昨非思改紀  
規隨養氣省心人

鄭玄三禮王弼易亦繪冕旒配孔庭虛耗中原實衛霍  
麒麟閣上也圖形

一河綠水小樓前八十老翁猶駕船七十老翁幸靜坐  
有書不讀真可憐

恨予生不及晦翁撰杖鵝湖觀異同豈減游揚侍程子  
未甘籍湜事韓公

膾炙鯨鵬吾不佞撮捫蚤蝨爾徒勞泰山夜半見紅日  
政要人生着脚高

後山卒僅四十九諱日崇寧一日前當時假使餘七袞

忍見中原丙午年

陳無已卒建中靖國元年歲  
除明日改元崇寧世事去矣

周家八百年天下文武焉知有赧王老壽彭公亦餘骨  
始知生死是興亡

少陵詩詫古來希老病餘生曷不歸不信神仙不信佛  
死時惟裹破深衣

送劉都事五十韻

晦叔  
密齋

近人於仕宦如以韓盧獵泰山有不見得獸誇足捷學  
問夫何如有書鑰諸篋府史以為師僅能署吏牒雕鞍  
驟肥馬畫閣貯美妾萬一至公相豈堪任調燮老友劉

客翁早隸周孔業大輅鸞和鳴大樂律呂協南省據都  
曹不以貴自挾朋來多下交賓至必謙接解官寓城東  
座寒乏氈氍高卧懶問選兩落秋蕘茨積薪後居上彼  
勇哂吾怯為言恥孟晉如病夏畦脅有時酤我飲荒墅  
縱步屨果核飮俎豆羹糝供匕筴居然道懷孚宜爾情  
話接公才豈不知大川宜作楫顧於名利波未肯卜利  
涉人生惑外物種種意欲愜高睨官爵梯等級恨不躡  
愚竊窺此翁嗜欲弃已斂寧為三省魯不慕一諾俠經

史入胷中邱陵堆重疊文詞落筆下布泉極熨帖莊重  
異新銳詳緩茂虛龍誰歟心怏怏或者言喋喋氣帥直  
其內義理為管攝歸歟掃松楸試負都門笈中書多缺  
員聞早下堂帖不然肅政臺冠豸羣小懾分司江之南  
亦足煦疲劣去當柳嘶蛭還及杏飛蝶鯀生嶺海夢尚  
憶鳶跼跼短隨李廣衣長彈馮驩缺萬死脫一生粗免  
翳桑輒今年七十老鬢禿無可鑷與人素寡合况又畏  
訟謀往往交游間平地生叢業萬里風枝殊一旦合鷄

鯨揮塵許諳聽曳履容追躡公將北闕覲我終南畝  
甚欲錢遠郊扶杖尾踪躑愧無一盃酒陽關唱紅頰他  
人多別筵推牛宰剛鬣而此何枵然窮極甚無劫顧視  
童子佩悅礪若鷗鞮持干富人肆詎肯出質貼吟茲送  
行篇終夜不交睫浩浩號西風索索雨水葉

張老山御史寄七夕詩今近中秋奉問

籠鶴囊琴駕短篷夏初言別又秋中一天遙共團圓月  
兩地相忘矍鑠翁朝廷還公黃閣相江湖乞我白蘋風



金臺乍到朋簪盍肯繫吟牋寄早鴻

方去言府判挽詩二首

諸老非前日吾宗有若人大圭全粹質勁栢挺長身倉  
卒完鄉縣艱難寢戰塵深慙銘筆短未足永堅珉

壬戌同登日秋崖尚見之王家子敬字謝氏惠連詩鄉  
校六龍渡宗盟七桂枝殘碑麟筆絕後死嘆吾衰

呈呂使君二首

師名  
一山

中川孤嶼稱詩才鴈蕩龍湫遍賞來千騎君侯鳴競病

五年朋友共敲推，舊題謝守池邊草。  
新寓逋僊屋角梅，欲叩吟牕看竒句。  
不應相遇只銜盃。

紛紛袞袞笑儒酸，獨愛齏鹽遠綺紈。  
國手文章無敵手，將壇家世上詩壇。  
海艘蕩寇鯨波靜，江寺除兇鬼膽寒。

才調極高心轉小，近時人物此尤難。

江心寺僧滯良人婦，厥後移家避去。

屠殺其家，缺缺口力，爭乃事主僧處死。

### 題畫馬

芻秣豐肥十二閒，筆追韓幹此圖間。  
誰描驢瘦更詩瘦。

首與雙肩共一山

題宣和黃頭畫

石綠藤黃間麝煤半枯瘦篠羽毳毳一時艮嶽天顏笑  
乞與宣和印押來

題陶介夫見山軒

湖上山如畫何人解見山此心無一事盡日捲簾間  
湖上山如故湖邊客總非容堂今不見涼夜草螢飛

寄平江王元俞治中并呈孟君復總管

兩玉人俱出相家一時頗有富才華登樓賦詠追王粲  
落帽風流致孟嘉未肯一莖生白髮相逢九日醉黃花  
蘇臺欲往何由得獨立吳山眺晚霞

送繆鳴陽六言

陸象山文集二十八卷袁燮為序外集四卷楊  
慈湖所為行狀孔熔所為謚議附與人書凡十  
七卷可議極多第十九卷記八篇王荊公祠堂  
記疵病為甚葉靖逸四朝聞見錄記象山三事

一為僧光拙庵所喝二謂危逢吉氣粗三學子  
焚香欲下拜持其手曰未可此皆朱文公所謂  
陸子靜分明是禪學者也鳴陽重刊象山集流  
布北方所至作詩盛稱其學紫陽晚學方回未  
敢以為然賦六言八句送之

象山之學超詣水心之學刻畫後村之詩卑陋樗寮之  
字怪癖舉世隨聲雷同衆啞啞我愬愬此四者皆不可  
尤不可第一癖

讀陶集愛其致意於菊者八因作八首

一曰秋菊盈園而持醪靡由

陶公愛菊滿園秋甚欲持醪竟靡由世事重華那復爾  
無錢更覺少陵愁

二曰空服九華

金英足可換君骨綠醕寧當腐我腸空服九華無九醞  
帝鄉何似醉為鄉

世短意恒多斯人樂久生佳句也九月而九日久之又久之義人生所樂

故舉俗愛  
重九之名

三曰菊為制頽齡

自性不隨黃落去始能為爾制頽齡  
涪翁具眼曾拈出我為重吟換鬼聽

四曰塵爵耻虛壘寒華徒自榮

杯空無酒非瓶恥耻在虛壘敢怨嗟  
想見此翁不憔悴天寒猶自有榮花

五曰芳菊開林耀青松冠岩列懷此貞秀姿卓

為霜下傑

人間紅葉去無蹤膏沐誰為百草容霜傑同時謚貞秀  
抗衡惟許老蟠龍

六曰採菊東籬下悠然見南山

採採東籬迹易尋悠然見處孰知心也曾目送飛鴻否  
誰不能揮叔夜琴

七曰秋菊有佳色裛露掇其英

飲酒成詩二十篇詩成多在菊花邊秋英掇取枝頭露  
想見朝朝起卯前



八曰松菊猶存

種松今世見松老種菊常年見菊開十一月霜花欲稿

巾車豈可更遲迴

淵明官彭澤八十餘日仲秋出十一月歸歲在乙巳

丙申重九前後得今日都無病一句成十首

今日都無病清晨獨倚樓端能常自遣孰謂不堪憂老  
謝人間事寒添雨後秋江天詩滿眼可似賈胡留

今日都無病康強百不憂近霜黃菊月過雨紫蘭秋可  
醉豈容避欲歸遄復休寒衣漿補辦此外更何求

今日都無病沉吟筭此生誓將全晚節懶復問脩程畏  
事防憂患收心入老成近時學康節更敢競時名

今日都無病今年粗慰心西風田畯喜南斗歲星臨人  
老顏如雪家貧菊似金典衣作重九猶可一杯斟

今日都無病移盆看菊花極知詩易齷唯苦酒難賒政  
用忽忽過何妨小小差重陽七十度大半在天涯

今日都無病重陽酒滿樽淺斟聊慰意高枕恐消魂杜  
老莫難得陶家菊尚存鄰人送糕果遙憶小兒孫

今日都無病黃花酒一觴登臨憐老者風雨過重陽  
稔歲真希有南天始欲涼餘生容苟活不敢昧蒼蒼

今日都無病重陽倏又過濁醪常醉好佳菊未開多豈  
必皆時節焉容不嘯歌一樽二三友風雨柰予何

今日都無病持杯得自如空行萬里路枉讀一生書可  
柰多魔障真當棄腐餘休官十六載此計未全踈

今日都無病閒將往事思不為一已計寧受百人欺老  
鈍文章拙溫恭禮數卑臨風一杯酒此意未全衰

趙氏鄮山書院詩并序 必

嘗攷古學校庠序塾之制以國學教胄子自唐  
虞始三代以來天子諸侯皆有之而天子曰大  
學萬二千五百家為鄉鄉置校自夏始故夏曰  
校二千五百家為州萬二千五百家為遂遂置  
序州亦有序自殷始故殷曰序五百家為鄉之  
黨二千五百家為遂之縣黨置庠縣亦有庠自  
周始故周曰庠天子六鄉六遂諸侯三鄉三遂

學之可攷者如此惟都鄙之學無可攷國學者  
天子諸侯國中教士之所公卿大夫之子弟元  
士之嫡子在焉校庠序之學在鄉遂六德六行  
六藝教其士以興賢而士之子恒為士者在焉  
至於家有塾則二十五家門之左右致仕而歸  
者為之師以教其子弟者是也是故周之教士  
為最詳且密今天下所至皆有學而東南書院  
尤多然風俗猶不及古何也有學之名而無教

之實故也四明趙公伯崖父法從名門年六十  
餘自稱最樂翁不以世故縈懷而獨有志斯文  
割大廈腴田創鄞山書院聞于有司設師弟子  
員以學以教以厚風俗之本紫陽晚學方回為  
賦四言詩二十韻紀之曰

國學在國鄉校在鄉在遂曰序在黨曰庠虞夏殷周厥  
制彌詳家亦有塾以脩以藏蒙而已養長罔不臧下而  
為士上而侯王莫不有師扶綱植常生人之類賴此以

生四海九州以治以平家德戶行靡刑靡兵豈若後世  
喪實存名業豈無齋論亦有堂所習伊何止於詞章剽  
竊掇拾青紫為榮高虛卑淺燭理弗明亦儒其冠亦公  
亦卿鄮山之塾誰實成之匪有所覲而斯營之一聖百  
賢厥庶煌煌晞之則是景行是行

呈李讓臣就寄翰林閩學士

鞭霆來自紫皇宮天上綸言播德風為報玉堂真學士  
猶憐雪鬢老詩翁星明斗極璇霄北水注蓬萊碧海東

身不能飛心獨往承顏常在夢魂中

久過重陽菊英粲然即事十首

早伴茱萸插帽紗尚堪薦酒更堪茶花邊行立花邊坐  
不是閒花是菊花

種就株株攢萬葉摘多榦榦茁三椹此詩兩句煩君聽  
不是閒花是菊花

倏過重陽幾一月菊花更覺有精神必重陽日始賞菊  
此是人間最俗人



紫陽山下園五畝一半教兒種菊花  
霜漸濃時花更好  
六年何事未還家

平生我解量人品元亮真成晉伯夷  
我欲招魂無別物  
剩將酒灑菊花枝

菊芳蘭秀幸同時汾水劉郎語最悲  
誰果肖蘭誰肖菊  
未知黃落又為誰

風霜無畏最耐久糞壤不資真自然  
正則夕餐骨已換  
凌江端作跨鰲仙

把之手香嚼齒香飫之燕之香肺腸金英滿泛日百盞  
何必帝鄉姑醉鄉

有酒泛菊嚼美酒無酒嗅菊倚闌干時人誰會先生意  
常把霜枝子細看

江南菊花差晚開把酒前蘭復後梅天公何嘗負此老  
天下腐儒臣方回

喜宗兄端叟再會武林還暨陽二首

我亦七旬老公為兩歲兄共知吾輩拙各賴此心平江

海逃簪紱乾坤寢甲兵喜逢又惜別久幸蔭宗盟  
兵間曾脫死不意各年高未覺才全盡猶能氣頗豪有  
詩嘗互看無酒可同遨吳越相思夢誰云隔夜濤

漫興九首

吐納誰能較故新更須大藥鍛金銀有詩傳世書傳子  
自是人間不死人

洶洶戰場元不懼恹恹貧巷亦無憂千金浪費如泥土  
今日何人識故侯

才到黃花有酒傾  
今人動欲作淵明  
併無儲粟夜無被  
此事知君學未成

餓信黥英遇漢皇  
攀龍附鳳化侯王  
河豚魚毒亡身耳  
何至身亡族亦亡

陰陰白晝似昏黃  
平地愁城萬里長  
稻卧三秋常是雨  
菊殘十月尚無霜

枕上半醒中酒病  
樓前時過賣花聲  
千門萬戶俱更換  
惟此依稀舊太平

向人開口便言閒每一題詩便說山請俸坐曹食梁肉  
又聞滿考轉官班

興賦雍容誦麥陂徐徐別頗用金椎通身都是臧污罪  
揖讓如儀解說詩


新莽窮姦卓極凶姦人更有阿瞞雄紛紛豎子成何事  
野火山林一燒空

記火

吾州斗大城辛丑藝於火予時年十五天地一螺豔窺

身城北門尚憶雙髻髻秋暑七月半洶湧沸炎堞日午  
饑無食枝頭得梨果不謂心尚孩析薪未克荷先君儒  
起家負冤踣奔播楮垣獲苟免小宅亦云頗先祖之舊  
居竟弗脫此禍二三叔父家貲產素不夥焚如旣已酷  
生理各坎軻老者漸喪亡賴嘗教勅我田屋悉破散江  
湖走一舸掇科敷歷久身幸青紫裹中年營一區稍於  
已意可紫陽正面南烏聊在其左前榮藝花木後圃蒔  
菜蔬軍興盜賊起萬卷破甑墮乙未九月灾天特赦么

磨歸然七十翁吾其理歸柁



桐江續集卷二十二



欽定四庫全書

集部

桐江續集卷二十三  
四

詳校官中書臣孫溶

主事臣呂雲棟覆勘

總校官庶吉士臣倉聖脉

校對官典簿臣劉景岳

謄錄監生臣鄧捷成

欽定四庫全書

桐江續集卷二十三

元方回 撰

禱興十二首

生世六六載始獲玷末科選官六六載仕少閒日多逆  
旅脫兵火專城免干戈中原久隔絕忽焉得經過水涸  
梁山泊淮流受黃河往者故已矣方來將若何開歲七  
十一聊擬自挽歌

十月菊半槁垂迨長至節炎州天氣殊蟄戶猶未閉也

北方當此時無雨有為雪吳霖百晝夜不見霜露結瘦  
馬濺腐泥裸袒舟子熱老子所居隘糞穢足嘔泄西望  
萬重山中有茅宇潔何當歸去來獨卧一榻設

淵明癸卯歲十二月中作用雪字凡十韻在十  
六屑十七薛內不出本韻則音切之分不始於  
陸德明矣惟和郭主簿節徹絕列訣六韻外月  
字一韻別在十月古詩不必拘也所以悠然見

南山五聯犯三韻

詩禮以發塚非獨王莽然手不離珠玉世豈一桓玄昔  
在魯聞人匪值孔聖旃焉得兩觀誅破彼辨與堅子陵  
湍石上元亮菊籬邊夷齊不可跂賴有此二賢

風高紫蘭推雪近黃菊槁物理有代謝焉得長美好古  
聖毓庶物必欲使壽老不幸凶短折豈若保終考莊生  
強齊物妄謂彭聃夭龜鶴動千齡難與蜉蝣道什襲夜  
光璧誰忍碎茲寶我評菊與蘭終勝百凡草

古人謹廟萃後世重墓藏埋骨冀裕後其術傳青囊富

貴出葬穴此說何渺茫含襚富珠玉所見尤不長自從  
開闢來天地幾戰場禍亂遭發掘不免帝與王甚者有  
逆孫暴其先世喪何由繫彼頸巨刃揮天揚

吳中魏文靖公父子三喪皆發建寧真文忠公  
盜有所得即復掩之朱文公深衣不損道貌儼  
然賊徒憤無所得所不忍言黥之汪氏孫發掘  
密汪公勃之妻唐氏凡十四穴獄未竟績溪西  
坑賊暴七軍攻之四五十里墓皆發名曰取棺

板為攻具

七十合致仕已閒十六年不謂得此壽念之豈非天固  
窮甘蔬飯室慾省藥錢脫遇人負我微愠遄釋然豈無  
不朽句作詩垂萬篇人品雖中中此心無媿焉

茲辰何太喜久雨見紅日當其陰晦時日未嘗不出有  
物苦障之雲霧暗如漆讒夫蔽天明忽去卷伯嫉泥汗  
后土乾歸路賃驢匹山中可釀酒自畚元亮秫預量小

兒孫時索梨與栗茅檐得霜晴炙背閱書帙

質述節  
韻難押

稻熟苦淫雨九月盡十月已刈及未刈半芽半漂沒饑  
飽係民命此變豈可忽雲師如葛伯仇餉佚天罰死木  
生菌蕈化螢草未歇恒燠繆為恩乖氣一何悖何如時

寒風霜晴大明揭田父得春枕一飯肉白骨

十月韻  
尤難押

人固有倒行天亦有逆施膾肝富且壽沴氣乃至茲歲  
旱茂稊稗夜暗號鴟鴞正卯宜一律遇塗姑異辭麟經  
沒其名直以盜書之萬古流惡聲榮華能幾時

勢位高於已謫子奴事之虎後狐前行假威將誰欺才

藝卑於已苟且相追隨庶幾不見軌延譽借諛辭老夫  
久擇交此心故異茲勿攀勢位高毋友才藝卑章惇招  
不往豐谷以為師彭城陳正字貽我有良規

南豐  
山谷

請託或有求攀附謂可羨不羨復不求貴公何必見恥  
折元亮腰免向宣明面江淹所賦恨未必識馮衍甘從  
伯倫醉久忘子夏戰白首爾同歸自作豈天譴

三十三線韻亦難押五十五艷六捺七釅雖險  
而易念占厭寔塹玷歎潛欠驗是也



魯論安昌侯田至二百頃後堂羅曲旃女樂極妍靚晚  
愛肥牛亭僭上輒有請行內憂外家略不效忠鯁口張  
理義門胸裏利欲奔持國送與人獨欲保首領焉知赤  
眉禍暴尸肉未冷寄言發塚儒厥報捷響影

送述明居士燕道覺歸東林

君不見錢塘西湖三賢堂林蘇宋人白傅唐三賢生本  
不相識死乃異代同烝嘗又不見吳江垂虹三高祠鷓  
夷一舸浮西施天隨陸子玄真子求志逃名非一時何

似廬山東林三大老生偶同時不同道道若不同同中  
心香爐峯下足幽討鴈門法師禪非禪虎溪道士僊非  
僊栗里先生醉非醉三方寸地通一天安靈猶想當時  
笑鼎立宇宙膽相照借問此笑笑者何別有丹青不傳  
妙述明棄官歸東林玉帝降敕榮冠簪羽衣似與儒釋  
異所不異者胸中心我謂不須較同異亦勿強求笑中  
意天下至今知幾晉法當忘言祖述淵明醉還醉

循分

閒與蒼穹酌一杯  
誓將坦蕩荅疎恢  
誰非身住蓬萊島  
汝自心生灑澗堆  
事久終難逃定論  
運亨豈必藉高才  
墮膚裂指河冰合  
自有春風到早梅

挽分水柳溪何處士二首

太學師名士  
初踰志學年  
樹護竭甘旨  
肯室擅林泉  
盜踵兵戈起家并  
里社全陳蕃  
舊懸榻惜未致  
斯賢

歷數更端後  
英雄崛起間  
子真逃谷口  
角里老商顏  
德共三槐遠  
名堪五柳攀  
知賢慙拙守  
論譔幸藏山

予銘墓

日長至寓杭

閒身不想入鷓行家近何分客與鄉所喜今年年最稔  
又逢此日日初長雲容頓改不為雨雪意尚慳仍作霜  
豈意老翁開八袞朋來聊與共清觴

自從卅角至童顛是事無心總聽天今日喜逢長至日  
來年恰遇古希年一官三紀閒居半萬馬千軍命偶全  
適有蜜蜂肯伴我晴香爛醉玉梅前

送張子敬湖南宣慰司都事

併序

昔歲在戊午予生三十二周星矣年壯氣盛視  
萬里路如跬步春夏自杭蘇常潤遊軫翼之野  
金焦山下乘大風泝長江一日間過儀真朱金  
沙至金陵龍灣而上雨花臺未暮心大快之梅  
潦江漲采石濡須塢以上寸寸攀挽甚難且隆  
暑抑鬱秋夜泛湓城馳小肩輿入九天採訪使  
者宮萬竹皆大如椽水曲折流其間涼徹骨髓  
心又大快之興國大冶路涉泥濘良苦出壽昌

抵武昌吟崔顥晴天樹芳草之句心又大快之  
又久之始登岳陽樓東下君山僧迎飯古木隱  
映猿獠騰躍心亦以為大快非也蓋行旅以遲  
滯為愁悶不愜意而山川林壑之奇邑屋人物  
之盛風濤雲物變化之不同故國遺墟成敗興  
亡之所以異有感於外有發於中觴古詠今亦  
不能不無所快也時獲從湖北常平使者魏公  
戶部行尤莫快於洞庭四大舟發君山西雪浪

際天惟遙見桅杪出沒其間炊釜水躍出人卧  
不可起猶犬皆吐頃刻抵鼓樓山落帆數鹽客  
告曰帆不可落今暮舟不能入武口則殆矣再  
掛帆入武口大雨作風止日甫暮是日不飯不  
知饑窘迫艱險同行詈之心獨以為大快既而  
自常武應舉如長沙大郡壯邑甲於南邦嘗至  
丞相張魏公府與潭府不殊西廊下面東屋三  
楹扁曰南軒宣公先生讀書之所也今垂四十

年如夢向之所謂大快者衰老鈍怯不復萌此  
心矣獨憶南軒先生之軒今兵後尚無恙否湖  
南宣慰使司都事張君子敬將之官煩問訊此  
軒幸因便風垂報以慰高山仰止之思云元貞  
二年十二月紫陽山方回序

湘水綠湘山青南衡嶽北洞庭太微翼軫相緯經上直  
長沙老人星其下潭府甲南溟有芷彌岸蘭彌汀騷人  
墨客紉芳馨丹砂黃金翡翠翎日中百賈喧雷霆艷舞



皓歌酣旗亭王宮細腰誇娉婷如斗如蜜餐楚萍誰其  
能賦弔獨醒厥今宣幕小朝廷如君人物猶典刑可振  
儒鐸鳴道鈴無使斯文淪晦冥南軒大名揭南斗南軒  
舊軒無恙否君能一出扶顛手亦足與之同不朽

追次郡君

宗偉

至節韻

天地育萬物風霜非作威陰陽互闔闔造化潛玄機凍  
樹根本固宿莽芽甲微外貌若槁死其中春已歸志士  
甘隱處栖栖將疇依龍蛇蟄深窟肯嘆寒無衣三變復

為泰鬼神不能違雷霆行且起梅邊玩晴暉

寄老山張鵬飛御史

通袖風霜手揮毫雅頌音柄臣曾見憚素士許同吟包  
括滄溟淺蜚騰歲月深一朝夢惟肖槁草仰商霖

寄集賢閣子靜學士

新年七十一衰翁此道心知萬折東名位集賢唐學士  
文章內相陸宣公兩朝綸綍傾前古四海紳縷立下風  
手把一枝梅欲寄江南歲暮待春鴻

紙牕

梅水仙花插古銅紙窓通日不通風  
天香何假龍涎爇地暖無勞獸炭烘

閉戶

閉戶瓶梅滿屋香小樓微醉月昏黃  
三更獨坐猶無寐更欲移花近枕傍

題譯學張提舉乃尊開封府尹張彥亨所藏郭熙  
盤車圖

車轆轤牛轂齮積雪皚皚飛雪救救前車上嶺後車續  
老牛服箱顧寒犢高雪彌山低雪滿谷戴笠執鞭凍腰  
跼曲畫師畫此何年事關塞遠征輓芻粟莫道牛疲項  
領禿人疲於牛痛欲哭峻嶺之下舊村落蕭灑人煙知  
幾簇莫道餉車過門外門內田家眠正熟百車千車過  
不已敲門乞索何時足牛豈不需藁一束人豈不取一  
匙粥鷄犬不可保妻子或窺伏畫中水閣爾整齊焉知  
不是逃亡屋我聞造化心至公人間乃有兩般風庶民

雌風扇臭穢何獨楚王之風雄天地山川同一雪眼見  
雪同心各別梁園才子簡欲授移監老臣羶自齧貧人  
閉戶洛陽卧壯士銜枚蔡州滅紅爐錦帳羔酒斟豈識  
盤車圖中意愁絕春日陌上花同遨擲果車不爾鰥翁  
嫠婦對花成咨嗟秋夜樓上月同醉生塵襪不爾羈臣  
逐客對月翻淒咽嗚呼身在雪嶺盤車圖還知世有子  
猷訪戴無

二十三日大雪彌甚

壓船塞戶路迷途絮帽羶衣馬緩驅一夜遽然三尺許  
萬家歡謂幾年無美觀頓覺湖山改生意潛迴草木枯

麵賤米平來歲事饑民誰與續朝晡

子庚戌年二十四喜雪有云平明萬

人喜此雪幾年無左史竹坡先生呂公取之為序美之今忽四十六年學不加進仍用前意為第二聯云

回生丁亥方端叟召乙酉長二歲其弟名萬里庚

寅少三歲用子舊韻來訂兄弟之盟依韻奉答二

首

聞說庚寅弟兼思乙酉兄樓高江樹遠帆去暮潮平樂

豈能延壽符焉可避兵各憑心事好共保歲寒盟

越州兄弟好年與德俱高未覺同宗各寧須蓋代豪雪  
爐稱夜坐花墅接春遨何日成三老茶甌淪碧濤

二十七日又大雪凡半月

茂林枯樹總模糊半月簷聲乍有無天鼓北風神轉王  
地窮南海瘴全蘇戰輦戍角夜烽火旅棹征鞍朝道途  
辛苦一生亦奇絕暮年猶許畫寒爐

二十八日殘雪不消懷舊

老眼今猶見雪明  
幾番絕景慰生平  
三高祠畔吳江棹  
百戰軍前鄂漢城  
顛沛艱難垂欲死  
登臨慷慨謾多情  
駱駝乳紫青貂暖  
老矣無由再玉京

二十九日歲除

六十年前幼學兒  
端平明日改嘉熙  
黔川亡妹來歸日  
歛隴先君改葬時  
學問文章成畫餅  
科名官爵看饒棋  
細思未覺家聲墜  
能忍窮人不是癡

丁酉元日年七十一



晚節詩如白樂天每逢元日有新篇九臚唱第今三紀  
七袞開端又一年風雪五更憐過馬兒孫百指望歸船

老身窮健無煩惱猶倚文章賣酒錢

去年喪長女今有五男子二女子三

男孫七女孫百指言大槩

扶胥灣口鐵山頭汗漫空為萬里遊一第僅如晁濟北  
萬詩堪繼陸嚴州可用老扶靈壽杖也曾親到結隣樓

餘生無所求於世今世何人識故侯

晁無咎別省第陸放翁詩萬首

元日感事

羞將白髮見青春  
世事何關蟣虱臣  
去就時難千里夢  
是非論定百年身  
偶然不死由天地  
尚可無慙對鬼神  
敢問名垂漢唐史  
蕭曹房杜本何人

贈方童子

燧去年  
歲暮詩

我年五十九  
門弧子垂左  
我今年七十  
見子雙髻鬢  
腹僅椰子大  
貯書一何夥  
疾讀建瓴水  
響應灸車輅  
光怪蟠肺腸  
不啻珠萬顆  
小松三尺許  
千丈氣磊砢  
近笑韓氏子  
瑟惻了細瑣  
遠笑陶翁兒  
但解覓梨果  
我年如子

時記誦亦云頗舉苦乃遺帚一懶萬事墮願子於心田  
及時勇耕播秋成斂精鑿糠粃勤節簸子之名曰燧此  
語本宰我捨舊新是圖學問甚改火字之曰又新進業  
幸勿惰譬如萬里途幸已餽糧裹一旦輟于行駿馬同  
驚跛近世文字繁動輒百篋鎖誰能發蠹魚丹鉛拂埃  
堞手之而口之五夜孤燈坐林下時思之解衣盤薄羸  
六經四書外一一與探揣鵬鯨大哉噉餘子或螟蠃又  
新有如此名世豈不可江之水湯湯念子駕歸舸汴源

尋紫陽子其正帆舵

元夕前雨不已二首

節屆燒燈柰若何客樓三夜聽霧霽春風有意催花信  
小雨如酥不用多

蘭膏畫炬出貧民寶馬香車屬貴人月姊雨師暗商確  
不須粧點上元春

清湖早春

曉窓初起望春雲天色陰晴未十分小雨漫空渾不覺

平湖點點見圓紋

岸邊老樹柳猶枯  
紅入挑花果有無  
一夜綠從冰底起  
誰將藍汁染晴湖

湖曲細嚼梅花嚙酒

梅心微苦似梅仁  
細嚼香鬚酒入唇  
笑指逋仙墳上土  
一杯好與酌芳辛

飲孤山六一泉有感  
亭以太湖石為柱梁

解后猶存石柱梁  
周家九鼎尚淪亡  
此泉只是尋常水

為有歐蘇姓字香

兩隣家一主人  
群姬歌飲至夜半  
一母妻哭官檢  
斃死者

歌喉絃指粉紅腮  
群擁山翁醉玉顏  
政恐真懽猶是假  
不如隣婦哭真哀

記正月二十五日西湖之遊十五首

來輿去馬禁城空  
豐樂樓消一炬紅  
說與吳儂莫惆悵  
龍墀猶化梵王宮

右豐樂樓

情知太乙已西遊  
築館焉能強挽留  
此老平生讓人者  
佛來我去尚何求

右舊西太乙宮改寺

一夜緇郎剗醮壇  
三清四聖化泥團  
也曾翰與林靈素  
頂上曾纓德士冠

右舊四聖觀改寺

千樹梅花斫半無  
有人更欲涸西湖  
曾思慎勿近前日

不看老彭觀井圖

右孤山梅多無枝

石梁石柱石為碑山拔泉飛石可移兩玉堂僊一髯叟  
自應名字萬年垂

右六一泉存

空埋貞觀蘭亭字再出文城玉枕書想見八梅塚無物  
生前曾笑馬相如

無封禪書之詩  
乃自為生墳詩

右林和靖墓存



身為帝傅辯章公慎恤竒丸侈後宮更欲長生汲丹井  
山中笑倒葛仙翁

右葛嶺名存

炎炎赫赫忽荒寒敗瓦頽墻百頃寬誰識舊朝大丞相  
手携紅妓倚闌干

右舊賈府無

容堂何地可容人一語忠規坐殺身母死明年爾亦死  
盜名猶謂再庚申

右容堂無

一犁酥潤萬牛耕  
飯碗人間係死生  
公子樓頭賞春雨  
杏花樹上聽新鶯

右春雨觀存

千山斫入亞夫營  
佳墅名園怕近城  
賴是白公資佛力  
小留蒼翠作秋聲

右竹閣僅存

業已通名敢退無  
小為性命忍須臾  
十年朝士知何限

不許遊湖許見湖

右壽星多寶瑪瑙寺皆候謁舊台客次

相逢劍客曳長巾曾道西湖看盡人石屋雨來春樹暗

人琴兩已作埃塵

予二十五歲飲此戚秋澗黃吟隱賞予絕句見舊集第一首劍客戚也

右江湖偉觀久無

六橋簫鼓日喧天誰料年來漸索然興廢榮枯都不識  
一家活計一漁船

右孤山漁戶

蘇公堤畔水如天，又見侵疆築葑田。  
遙望橫斜似碁局，飛鳥翹鷺自爭先。

右湖裏葑田

清湖春早二首

半河樓影半河天，未有行人趁早船。  
閒聽賣花聲自好，可須多費買花錢。

樓上春陰覆曉雲，一河天淨碧沄沄。  
雨宜不驟風宜細，閒倚闌干看水紋。

二月十五日趙君實南山別墅侯主客俱不至

籬落梅殘野菜青  
田間閒看鶴梳翎  
主人不到客且去  
細雨南山暗畫屏

垂欲歸主客皆至

荒林野塚古原頭  
倚樹何人識故侯  
幽僻聞寥變歡笑  
針鋒芥子忽相投

三賢堂已無官賣其址

三賢無像亦無堂  
敗柳猶垂赤土墻  
官賣神祠有前例

熙寧丞相起坊場

江南賣酒謂之春場近日有買豐樂樓基者倉屋萬間者民得買之

### 三賢堂移入西湖新書院

湖邊莫怪舊祠荒  
士女何曾炷瓣香  
賴是人心猶未泯

深衣迎奉入書堂

徐廉訪子方新作西湖書院祀三賢孔廟後甚盛德也

### 集賢堂已無

舊日三賢又集賢  
看人歌舞過湖船  
一時去取非公論  
到底終難昧老天

### 湖山堂再修僅有

飛鳥穿堂柱半欹春晴猶不似春時上梁文記臨邛魏

天目洪家却立碑

魏靜齋所建權臣惡之  
乃勒碑為洪雲巖所建

南高峯至其下不高

遠望生愁陟降勞崢嶸窄堵據金鰲今朝身到南山下  
漸近元來總不高

北高峯屢欲登而輟

擬上高峯最上頭籃輿已賃又還休舊來詩眼如今別  
添與江南一段愁

左顧保叔塔右顧雷峯塔并南北高峯塔為四

四山角立四浮屠絕似雙林競寶珠萬古一丸拏不去  
夜深朗月浸澄湖

中望吳山下一汀是為杭州

秦皇繫纜北山頭一抹江邊海變洲百萬生人無葬處  
蝸爭蟻戰不如休

哭鮑景翔魯齋

併序

鮑景翔諱雲龍歛縣北鄉人長回一歲嘗以易



魁鄉舉著天原發微二十五篇首曰動靜次曰  
靜動深得周子所謂動靜無始陰陽無端之奧  
周易乾卦從元起而元之前已有貞所謂誠之  
通誠之復蓋如此歸藏首坤亦此之謂丙申歲  
卒壽七十一提學鄭君昭祖許刊其書傳世

學從元字起貞實已先元密玩坤乾易精探宇宙根與  
公傳後世有容踐前言萬古立齋極惟思夜氣存

高年開八表細字尚親抄已矣蠅頭筆誰其鳳嘴膠能

傳言外意始識畫前文此老埋黃壤紛紛嘆面交

送孫君文還桐廬二首

潼發戊辰甲科

談笑丁年取甲科一官潦倒鬢今皤飛騰尚覺聲名在  
枯槁其如骨相何舌鼓風雷無與敵胸吞海嶽未為多  
向來一紀桐江上殊欠先生共切磨

時違運往豈無才老氣崢嶸隘九垓漫仕有聲徐偃國  
賦歸不愧子陵臺相逢苦雨泥雙屐可及晴湖汎一杯  
忽又趁潮上桐瀨山中春筍正堪煨

種花

平生無嗜好有地種花看萬玉梅成列千金菊作團秋  
宜鴻後冷春惜燕前寒更喜薰風好青青筍上竿

買花

客中無玩好日喜買花看酒債千金易春晴一刻難擔  
驚紅杏過案惜玉梅殘蜂蝶知何處猶應怯曉寒

題陳學正巨源萬竹

濤遂安人并序

或問種竹之法少為貴歟多為貴歟曰皆可也

屋之外僅有隙地數竿可數百竿亦可其或長  
林巨麓流泉飛瀑間則千竿亦可萬竿亦可猶  
若讀書然緊切之書能消幾卷不遠復為三字  
符一句亦足以終身矣然古之博洽之士或讀  
至萬卷不厭竹所以清世之塵俗書所以神人  
之智慮少有之不為少多有之不為多今之人  
家既有竹腹又有書者蓋寡遂邑陳君濤巨源  
徙家睦城種竹至萬子舊太守解郡十七年始

再見之雖未嘗造其竹所而窺其胸中多書足以稱是云多竹故喜而賦之

種竹種竹種愈多愈不俗種至萬竿猶不足讀書讀書讀愈多愈不愚讀過萬卷非有餘竹萬竿環我屋書萬卷遮我目書在竹中身書中竹風吹書沃心胸倚竹挾書送飛鴻不識人間有王公

題一家清雅集送植芸胡直內

方

累朝科第總名臣四世能詩才二人參透雄深兼雅健

鍛成俊逸更清新馬班翁季羞前躅王謝雲仍踵後塵  
頗恨昔叨桐瀨守未能繡梓勵儒紳

寄題雲屋趙資敬啓蒙亭風雲亭二首

彌忠并序

回為作翠侍題詠序矣又為題雲屋省心亭翠  
侍亭問道亭有有堂五絕矣又為作問道有有  
二記矣詩文凡八首梓行士大夫觀之醜形莫  
遁乎明鏡拙手見嗤於巧斤者也尚有啓蒙風  
雲二亭未之賦輒再呈醜弄拙奉一笑

坤三變艮山天一生坎泉注谷未浩浩滴石初涓涓君  
子觀厥象有若童樨然更歷幾險阻然後為巨川始教  
及齟齬成功從心年夫人可為聖往聖敢自專果行誓  
必往江海迷沂沿育德滋無窮晝夜鳴潺湲雲屋有遺  
老鑿渠玩清漣時時汎羽觴坐致蘭亭賢曷時亦酌我  
同賦臨流篇

右啓蒙亭

昔人築雩壇群巫此歌舞驕陽煽蘊隆吁嘆以降雨良

辰歲時和遺迹林壑古枯枿換槁葉芳萸抽宿莽徜徉  
沂水上童冠七或五春袖風乎茲績繡無火黼千載想  
佳人不仕東國魯異彼三子撰聖師獨予取吾友趙隱  
君笑唾卿相組猿鳥聽新詠點瑟時一鼓漢歌魯罔聞  
楚臺未渠數冷冷列禦冠肯爾噲等伍

右風雩亭

送鄭君舉宣城教諭

宣城畫虎遍天下葉公好龍龍之假百儒願陶一真者



紅花木瓜銀杏園年年包貢入中原何如興賢起邱樊  
學徒尚有老梅否詩聲千古捋歐九子其作人舉薦口

送劉叔有還古鼎

三畏

我嘗飛過洞庭湖但有青天地欲無出峽蜀人趨鼎澧  
沂江荆閩救巴渝飄零詩酒全如夢流落兵戈剩此軀  
今日昇平歸去好汎洲應有橘千株

題詩曾到古桃川回首驚嗟四十年畫省郎官領賓客  
白鬚道士似神仙合城圍解江流沸鄂渚兵旆廣徼穿

此處與公已相識時籌前事一茫然

予戊午從魏靜齋戶部湖北倉使至

常武已未合圍解鄂州急廣西透岳間幸免今四十年

### 題趙循老立齋

是身猶厦屋下棟乃上宇一旦賀燕雀千關庇風雨輪  
奐易翬飛難致礎上柱桓楹一以植次第萬厥戶尼父  
早志學更加歲十五生知幼至壯始以此自許父師宿  
培壅忍作蘧蔭俯貞固軀峙幹幸不夷左股立斯以行  
斯萬里在接武務本果馬賴腸書飽撐拄

題趙繼孫拙齋

魯顏得聖傳何謂魯與愚外察若不足內朗實有餘擇  
樹鵲巢高罾虫蛛網虛曲士挾小智豈不雄里閭之子  
息機心抱甕灌園蔬晚食足當肉賁趾寧舍車九卿彼  
四至惡名垂簡書天孫夜乞靈悔不佞文疎衆人笑我  
拙囊螢披蠹魚我亦笑爾巧技止黔之驢

午困

老人無所嗜惟書尚喜讀矧又晝正長聊此展卷軸閱

久困已極端坐閉我目稍稍收神明內觀默往復謂可  
略歌枕童子致委曲心懼聖師責美材化朽木倦憊不  
可奈一偃寐輒熟何事忽驚覺客至義當速與語了無  
味退就一影獨原本缺五字尚賴有脫粟朱墨工未竟  
點勘繼以燭還將夜有餘用補日不足行年過七十馬  
用強自勗起倒不由人曷不返空谷

三月二十日張君輒約飲王子由紫霞道院酒字  
為韻

城中殘春未識春城外心賞無不有今年春寒晚乃暖  
尚餘飛絮忘高柳西湖孰謂西子老雖老絕勝登徒醜  
刺水乍見新荷翻銜泥莫辨乳燕耦兒曹惡陳爭喜新  
好以玄鬢嘲白首遮莫少年自得志看人輕肥但袖手  
今朝天色適可意張文殷兄總閒叟此一秃翁許追隨  
琳宮菊花問開否主客十人人能詩冥搜遠討心欲嘔  
何如平易任天真索紙便作龍蛇走仇仙笑指臯亭山  
橫塞武林當水口不爾歌舞百萬家馬能奕世長保守

我獨睥睨壽星寺欺孤柄臣據其右一朝擊死木棉庵  
頭驢可朽臭不朽向來世故未深識折腰此人覲升斗  
追憶謝傳小忍語竊虞桓玄錫命九山河變幻泗鼎沒  
脫身萬死亦云偶升沉得喪俱置之天地古今一杯酒  
乍聚忽散醉忽醒浮生邂逅理難久王侯皂隸浪分別  
頃刻白衣化蒼狗

記遊自次前韻

百歲十分過七分僥倖古來所希有尋壑經邱詎得知

揣謂偷閒問花柳未暇扶杖支疲癯每羞照鏡現老醜  
商洛隱遁似輩行幽并游俠豈朋耦朝哦雅什諷騷些  
夜玩易又測玄首焚膏空餘冰檠心補袞不到犁鋤手  
驚思此生如掣電昨日黃童今白叟灸眉折肱了不悔  
愛評文字判是否包藏彼且城府深馥直我乃肺肝嘔  
爾來何止師左次三十六策上策走况如韓子生之辰  
牛奮其角箕張口梯衝百道公輸攻一默不荅堅墨守  
城西俊遊小不忍焉能軒左復輕右蘭亭梓澤座有人

足與德功叅不朽是日已嘗穀雨茶是歲木星守南斗  
是集舉杯各見醕淺量可能一敵九坐視喧譁醉愈恭  
不記俎竒忘豆偶麥熟在即麩蕪富更願所至可賒酒  
情懷坦蕩尚真率滋味淡薄保長久寧從散人盟狎鷗  
勿作功臣烹走狗

次韻全君玉和高士馬虛中道院

并序

後生晚進不識文字見朱文公所注參同契即  
同美之本無識也其一環圖言震至乾巽至坤



與康節先天圖合康節以此圖窮易學之奧魏  
伯陽何人哉進火退火欲三年而成仙乃一己  
之私也回以為淺之又淺非立之立者也諸人  
闕然見罵謂回不識參同契背朱文公之說回  
敢謂汝小子不識回之說回之說先天圖心法  
學聖賢也伯陽道家學偷生逃死淺之淺者也  
世人讀書不究義理哀哉

古人無欲非引年古無有欲之聖賢曰無欲者無私欲

吳皇魯叟畫繫傳柱下木子知止足豈謂出神凌紫煙  
驂鸞駕鶴事恍惚別異道家分神仙淺之又淺伯陽契  
癡兒妄詫玄又玄內丹水火一升降觸體立變童顏妍  
三載告成奪天地汝拖腸鼠能攀牽私欲如此大莫大  
破入寒獄救倒懸遨崑登閻謂不死終然白骨埋黃泉  
腐儒一笑了萬事何謂赤明龍漢前號召風師呼雨伯  
杖劍叱喝急急律四時飯噉百花香萬間履入一壺窄  
洞天有之魂兮來弱水元無跬步隔拄杖化龍鳥作鳧

意所不求忽自得醉眼暫作如是觀誰識詠歸暮春瑟  
和同光塵亦一法豈敢訑訑見顏色為問今生賀知章

孰兩杜甫雙李白

參同契五環圖共似先天圖而以求  
長年乃私心也學易為聖賢方是天

地之  
公是

### 寫心五首

見惡巷伯嫉聞善臯陶都空言非袞捷焉有賞與誅  
君子定相忘小人將見圖口過信未免心過吾實無浪  
自作臧否了不關生枯龜殼愛鑽灼何如伏泥途

今日忽不愁脫然體無病餽飾窓櫺明整齊書冊正生  
無快意事適此悅我性雨足明當晴更喜天宇靚

世人好圖畫山水及動植墨煤與粉繪軸而掛之壁畫  
豈有天趣識假真不識我有古盆瓶清晨井自汲時花  
簪數枝悠漾詠金鯽靜坐玩生意默然若有得此見亦  
淺狹撫几忽起立我家山水鄉鶯啼春草碧

我既不干世人故不我知我能自不輕人亦莫我欺夏  
潦江湖溢雲雨翔蛟螭兩涯一以涸豈無藏蟄時外凍

內不死復雷潛地維何必慕薺菜竊借春風吹

此身脩至此尚恐玉有瑕自茲脩更脩庶幾寬我涯不  
然輪生角豈不枕厥車故無熊虎卜亦未夢龍蛇學不  
取臨川文不取永嘉詩不取晚唐有正寧無葩真魏吾  
所師未覺朱程賒此身脩至此餒死曾何嗟

題陳宗魯東山書塾

登名醫

芳草謂發顛美石謂發狂自賢與自智豈必草石嘗勿  
以夫子廟而欺賜也牆勿以聖人室而鄙由也堂楷庭

有遠孫美玉深匱藏姓名似元龍家無上下床收歛河  
海氣遁逃聲利場衆謂陟泰嶽六合視茫茫我之魯東  
山亦可小靈光不患見不穹但患行不强十駕日不已  
突過騏驎良美酒無深巷苦李遺道傍四益視乃叛蘇  
合殊糞蜣

唐侯舉摹刊詩卷牟獻之文趙子昂字

金馬文章坡穎氏玉堂字畫獻羲之得兼哀施棗此刻  
價倍湖州校正詩

孟浩然雪驢圖

往年一上岳陽樓西風倏忽四十秋詩牌高掛詩兩首  
他人有詩誰敢留其一孟浩然解道氣吞雲夢澤其一  
杜子美解道吳楚東南坼浩然詩不多白白盡堪傳天  
下詩人推老杜老杜又專推浩然我亦嘗遊江漢邊梅  
花臘月猶年年一句新詩學不得謾飽槎頭縮項鱸雪  
天誰寫詩窮狀凍合吟肩神氣王短褐長夜死不朽貂  
蟬何必凌煙上偶隨故人直玉堂龍鱗不顧嬰君王李

太白賀知章三郎不識放歸雲水鄉子美先生餓欲僵  
浩然先生不直內廐一疋馬可是蜀棧騎驢山路長

丁酉生日二首

今年五月冷非常擁袖無聊一老尪應俗但宜司馬好  
全生不必次公狂絳人甲子差相近皇考庚寅暗自傷  
病酒客樓聽泥屐愁邊更用雨淋浪

未甦殘醉茗頻煨夙荷諸公載酒來照鏡所存唯雪鬢  
典衣已盡况銀杯色嬰單豹偶然耳帶索啓期焉怨哉



弱水元無三萬里此心安處是蓬萊

生日又二首

畏途偶許玩餘生晚節尤難保令名一秃翁真韓長孺  
五男兒可晉淵明淒風開戶綿重着漏雨濺床酒懶傾  
俗事沓來敗人意且須堅坐待天晴

豈料生逾七十年孩提脫死瘴鄉煙未能湯餅觴朋友  
祇合爐香拜祖先養性有書知道理奪胎無藥學神仙  
天都峯下舊茅屋消得巖灘十日船

八二二〇五ノ一

洞江續集

三

桐江續集卷二十三